

فريق التفريغ بموقع الطريق إلى الله

يقدم

من سلسلة "كأنك تراه"

وَاصْطَبِرْ لِعِبَادَتِهِ (2)

(باللهجة المصرية)



لفضيلة الشيخ: د. حازم شومان

رابط المادة: <http://way2allah.com/khotab-item-121811.htm>

السلام عليكم ورحمة الله وبركاته

امسح من حياتك أي شيء يشغلك عن الله

إخواني وأحبابي في الله، يجلس سيدنا سليمان الجلسة اليومية بتاعته، الورد اليومي المُقدَّس بتاعه بعد العصر يذُكر الله وقلبه مليان جلال لله وهو بيذكر ربنا يعرضوا عليه عشرين ألف فرس من أجود أنواع الأفراس على وجه الأرض وهو بيذكر الله بيصّ للأفراس منظرها روعة منظرها تحفة يفضل مبهور بمنظرها لحد ما يُفاجأ إن الشمس غابت والورد راح، والورد اليومي المقدس بتاع سيدنا سليمان راح منه.

سيدنا سليمان انتفض قلبه **"رُدُّوْهَا عَلَيَّ فَطَفِقَ مَسْحًا"** ص:33، مَسَحَ عشرين ألف فرس من حياته لأنها عطلته عن عبادة ربنا ساعة، أُمال إحنا يا جماعة اللي ضيَعْنَا أعمار بعيد عن عبادة ربنا، مسح عشرين ألف فرس من حياته لإن هيّ ضيعت عليه ورد عبادة أُمال إحنا يا جماعة اللي ملناش أورااد عبادة أصلاً، الليالي كام ليلة من غير قيام، وكام يوم من غير صيام.

مَن يشتري الخير كله بساعة؟

"وَاصْطَبِرْ لِعِبَادَتِهِ" مريم:65، هُوَ ده الشعار بتاعنا، الحلقة الثانية من اصْطَبِرْ لِعِبَادَتِهِ يا إخواننا، لحد دلوقتي لسه بنقول مين يشتري الفتح بساعة؟ اصْطَبِرْ لِعِبَادَتِهِ يعني اصمد للورد اليومي المُقدَّس، اصمدي في الورد اليومي إلى أن تَلْقَى الله، مين فينا له ورد يومي يا إخواناً؟ مين يشتري الفتح بساعة؟ مين يشتري النصر بساعة؟ مين يشتري تفريج الكربات بساعة يومية؟ مين يشتري طهارة القلب وركاة النفس بساعة يجاهد فيها في العبادة كل يوم بين أيدينا ربنا؟ تعالوا نعيش في جنة قَوْل الله: **"وَاصْطَبِرْ لِعِبَادَتِهِ"**.

أهداف الحلقة

الهدف الأول: وِرْدك سلاحك حافظ عليه

"وَاصْطَبِرْ لِعِبَادَتِهِ" هدف الدرس ده إيه يا جماعة؟ هدف الدرس دا إن كل واحد مننا لازم يبقى له وِرْد مُقدَّس يومي في العبادة، أيًا ما كان الورد زي ما هنقول دلوقتي، اصْطَبِرْ ده لفظ عسكري، مصطلح عسكري يقول للجندي اصْطَبِرْ لسلاحك، اوعى حد ياخذ منك سلاحك في المعركة وإلا تضيع، كإن العبادة دي السلاح بتاعنا في مواجهة الحياة،

كأن لو وردك اليومي راح منك تضييعي، هو ده الهدف بتاع النهارده يا إخواناً إن من غير الورد التعبدي اليومي نضيع، وهو ده السبب في كل مشاكل حياتنا من أولها لآخرها.

الهدف الثاني: الانتقال من الفكر المشاعري إلى الفكر العملي

الهدف الثاني: الانتقال من الفكر المشاعري إلى الفكر العملي، الانتقال من فكر قلبي لفكر وردي، كلمة قلبي كل الملتزمين: ما أعرفش أتكلم عن ربنا إلا لو ألقى قلبي، أنا مُحْبَط لإني مش لاقى قلبي، أنا مالمقيتش قلبي في صلاة التراويح امبارح... لفكر وردي، يعني إيه وردي؟ يعني فيه أورايد ثابتة بنعبد ربنا فيها هي اللي هتجيب القلب وهي اللي هتصلح القلب وهي اللي هتوصلك بالله، بس أهم حاجة تستمر عليها.

فكر قلبي جاب إحباط عند كل الملتزمين إنما فكر وردي هيجيب القلب؛ لأن إصلاح القلب مقصد عظيم وهيخليكي مستمرة على عبادة الله.

هذه غدوتي بدونها تسقط قوتي

الورد التعبدي المقدس اليومي، ابن تيمية - رحمه الله - كان يقول على الورد اليومي كان يقعد من الفجر لحد الساعة عشرة الصبح يذكر الله، فابن القيم بيأله عنه قاله:

"هذه غدوتي فإن لم أتغدها سقطت قوتي" يعني إيه؟ يعني من غير ورد عبادة إنت ما عندكيش قوة في مواجهة الحياة، ما عندكيش قوة تبقى البنت معدية مش قادر تغض بصرك ليه؟ مفيش قوة، مفيش ورد عبادة، مانتش قادر تصبر على ابتلاء، مفيش قوة..

فإن لم أتغدها سقطت قوتي، تسقط قوتك على إنك إنت تشتغل في الدعوة، تسقط قوتك على إنك إنت تكظم غيظك لما حد يغيظك، تسقط قوتك على إنك إنت تطلب علم، على إنك إنت تقلل نومك وتصحى لقيام الليل، يبقى بدون ورد عبادة إنت بدون قوة في الحياة، إنت ريشة في مهبّ الرياح.

وردك التعبدي بمثابة سيارة إسعاف لإنقاذك

الرسول - عليه الصلاة والسلام - كان جاله وفد من ثقيف، فالنبي كان كل يوم بعد العشاء يروح يدعوهم إلى الله يكلمهم عن ربنا، أسلموا، في مرة النبي أتأخر عليهم، فالنبي - عليه الصلاة والسلام - رايح لهم فيقول لهم هو أتأخر ليه، - الحديث حسنه الإمام ابن حجر العسقلاني - فقال لهم النبي - صلى الله عليه وسلم -:

"إنه طراً عليّ حزبي من القرآن" يا جماعة الكلمة دي كلمة تطير العقل، إني طراً عليّ حزبي يعني الورد بتاعي راح مني النهارده لإني أنا اشتغلت في الدعوة، "فكرهت أن أخرج حتى قضيتته" أنا ورد القرآن بتاعي راح مني النهارده بسبب الدعوة فأنا ما قدرتش أخرج لكم في الدعوة تاني غير لما أخلص وردي.

إني طراً، طراً ده يا جماعة يعني مستشفى طوارئ، يعني الورد التعبدي اليومي ده عربية إسعاف، يعني الورد التعبدي

اليومي ده عربية الإسعاف والإنسان عامل من غيره زي اللي مرمي على الطريق السريع خطاه عربية لو ماجتش عربية إسعاف تنقذه فوراً يبقى ضاع.

حارب نفسك في ورد العبادة اليومي

يعني إذا حَضَرَ الْوَرْدَ كَأَنَّهُ لَا يَعْرِفُنَا وَلَا نَعْرِفُهُ، علشان كده حبيب الله محمد -صلى الله عليه وسلم- يقول: "الْكَيْسُ - العاقل- مَنْ دَانَ نَفْسَهُ" دان يعني يقولك فلان دانت له البلاد، حاربها لحد ما دانت، حارب نفسه في ورد العبادة اليومي لحد ما قهرها وخلّاها تتبعه مش هي اللي تقوده بأهوائها، وعمل لما بعد الموت" حسنه الترمذي، لما دان نفسه عمل، لما دان نفسه انطلق في العزيمة، الورد اليومي هيبث عزيمة جبارة جَوَّانًا يَا إِخْوَانَنَا.

الهدف الثالث: الاستمرار هو الدين

الاستمرار يا جماعة، هدف درس النهارده إن إحنا نقول إن الاستمرار هو الدين، لما ربنا قال للنبي جاهد؛ ماشبش، لما ربنا قال للنبي ادع؛ ماشبش، لما ربنا قال للنبي "فَاسْتَقِمَّ كَمَا أُمِرْتَ" هود:112، شاب شعر النبي -عليه الصلاة والسلام-، "شَيْبَتِي هُود" صححه الألباني، شاب شعر النبي، المفسرين قالوا علشان قَوْلُ اللَّهِ: "فَاسْتَقِمَّ كَمَا أُمِرْتَ" يعني استمر.

علشان كده الراجل جاي للنبي -عليه الصلاة والسلام- يقول: "يا رسول الله، قل لي في الإسلام قَوْلًا لَا أَسْأَلُ عَنْهُ أَحَدًا بَعْدَكَ -وفي حديث أبي أسامة: غيرك-" قَوْلِي عَمَلٌ يَا رَسُولَ اللَّهِ لَا أَسْأَلُ عَنْهُ أَحَدٌ بَعْدَكَ "قال: قُلْ آمَنْتُ بِاللَّهِ" كده دخلت الدين، طب الدين بقى كله اجمعهولي في كلمة يا رسول الله "فاستقم" صحيح مسلم، يعني إِنَّتِ دِينِكَ عَلَى أَدِّ اللَّيِّ إِنَّتِ مُسْتَمِرَّةٌ عَلَيْهِ مَشِ الْفِرْقَاتِ، مش يومين عبتِ وبعد كده نمتِ، دِينِكَ عَلَى حَسَبِ الْأُورَادِ اللَّيِّ إِنَّتِ مُسْتَمِرَّةٌ عَلَيْهَا.

نِعْمَ الْعَبْدُ .. أَمْ .. هُوَ وَالْعَبَاءُ؟

علشان كده لما سليمان استمر على وِرْدِ الْعِبَادَةِ رَبَّنَا قَالَ عَلَيْهِ: "نِعْمَ الْعَبْدُ" ص:30. إِنَّمَا "اتَّخَذُوا دِينَهُمْ هُوًا وَلَعِبًا" الأعراف:51، بعض المفسرين قالوا: اللي بيلعبوا في الدين، يومين يقوم الليل وبعد كده يسيبه، يومين تقعد جلسة الضحى وبعد كده يسيبها، أسبوعين يصوم وبعد كده يسيب .. يبقىي إِنَّتِ عَايِزَةٌ تَبْقَى "نِعْمَ الْعَبْدُ" وَلَا تَبْقَى "اتَّخَذُوا دِينَهُمْ هُوًا وَلَعِبًا"؟ نِعْمَ الْعَبْدُ اللَّيِّ هَيْسْتَمِرُّ عَلَى الْأُورَادِ، اتَّخَذُوا دِينَهُمْ هُوًا وَلَعِبًا لَعَبُوا بِاللَّيِّ مَا عِنْدَهُمْشْ أُورَادِ.

ما جعل الله لمؤمن أجلاً دون الموت

يا إخواناً القضية خطيرة، الحسن البصري يقول: "والله ما المؤمن الذي يعمل الشهر ولا الشهرين ولا السنة ولا السنين" مش المؤمن اللي يقوم الليل شهر ويسيب، ولا اللي تصوم اتنين وخميس سنة وتسبب ..

"ما جعل الله لمؤمن أجالاً دون الموت" المؤمن اللي عنده أورد حتى الموت.

خمس أوقات للورد التعبدي.. اجعل لنفسك ورداً ثابتاً

طب تعالوا بقى يا جماعة في النهاية تعالوا بقى يا جماعة نشوف التشكيل بتاعنا؛ لأن التشكيل النهارده هو أخطر حاجة في الحلقة...

"إِنَّهُ أَوَّابٌ" مش ربنا قال: "نِعْمَ الْعَبْدُ إِنَّهُ أَوَّابٌ" أنا عايز أبقي نِعْمَ الْعَبْدُ يارب، خليك أَوَّاب، يعني إيه أَوَّاب؟ الأَيِّبَةُ في اللغة أن تَرِدَ الإبل الماء كل ليلة، يعني ليها وِرْد ثابت كل ليلة، الأواب كما يقول عبيد بن عمير: "الذي لا يقوم من مجلسه" اللي وهو قاعد في الورد بتاعه لو حصل زلزال مايقومش من الورد بتاعه.

خمس أوقات في اليوم ربنا نَدَب العبادَة فيها، خمس ساعات في اليوم اختاري ساعة أو ساعتين دلوقتي كل واحد منكم يا جماعة كل واحد -بيننا الله- كل واحد مننا دلوقتي يا جماعة يختار ساعة أو ساعتين ثابتين مُقَدَّسين يبقى أَوَّاب فيهم، لو إنت ثبتت في ساعة من الخمسة دول واللي يقدر يزود يزود بقى أو زَوْدِي بالتدريج بس ابدئي بساعة في رمضان تثبتي عليها وبعد رمضان تعاهدي ربنا عليها.

خمس ساعات: الساعة اللي بين المغرب والعشاء، الساعة اللي قبل الفجر اللي هي قيام الليل، الساعة اللي بعد الفجر اللي هي جلسة الضحى، الساعة اللي قبل الظهر اللي هي جلسة التهجير، الساعة اللي بعد العصر اللي هي تسبيح الآصال، خمس أورد يومية اختاروا منهم يا جماعة زي كل الصالحين علشان تبقى حَققت قَوْل الله: "وَاصْطَبِرْ لِعِبَادَتِهِ" اختاروا.

الساعة الأولى: الساعة بين المغرب والعشاء.. إحياء ما بين العشاءين

الساعة الأولانية بين المغرب والعشاء اللي هي إحياء ما بين العشاءين. لو قعدت بين المغرب والعشاء أخذت ثواب صلاة المغرب والعشاء جماعة، والعشاء جماعة بقيام نصف الليل، وأخذت ثواب الرباط "انتظار الصلاة بعد الصلاة" صححه الألباني، وأخذت كتاب في عليين "صلاة على إثر صلاة لا لغو بينهما كتاب في عليين" حسنه الألباني.

الورد ده أنسب وِرْد لكل الطلبة حتى أيام الامتحانات؛ لأن من المغرب للعشاء مش هتلق تذاكر صفحتين ثلاثة، يا إخواناً أعرف تاجر في القاهرة بيقعد من المغرب للعشاء في الجامع لو جاله صفقة بمليون جنيه مايردش على التلفون، ليه؟ ده وقت الأوبة بتاعه "إِنَّهُ أَوَّابٌ".

علشان كده الحسن البصري -رحمه الله- يقول في قَوْل الله -سبحانه وتعالى-: "تَتَجَافَى جُنُوبُهُمْ عَنِ الْمَضَاجِعِ يَدْعُونَ رَبَّهُمْ خَوْفًا وَطَمَعًا وَمِمَّا رَزَقْنَاهُمْ يُنفِقُونَ" السجدة:16، يقول: "تَتَجَافَى جُنُوبُهُمْ عَنِ الْمَضَاجِعِ ده من المغرب للعشاء" لأن زمان كان من المغرب للعشاء الناس ما بتقدرش، الناس بتصحى من الفجر، تَتَجَافَى جُنُوبُهُمْ عَنِ الْمَضَاجِعِ يعني

قيام ليل من المغرب للعشاء، طب ثوابه إيه؟ **"فَلَا تَعْلَمُ نَفْسٌ مَّا أُخْفِيَ لَهُم مِّن قُرَّةِ أَعْيُنٍ"** السجدة:17، فلا تعلم: يعني ثواب مهول ربنا أخفاه حتى عن الملائكة.
يبقى الساعة الأولانية ساعة إحياء ما بين العشاءين، ما بين المغرب للعشاء، اختار.

الساعة الثانية: الساعة قبل الفجر.. قيام الليل

الساعة الثانية الساعة اللي قبل الفجر اللي هي قيام الليل يا جماعة، وهي تنفع بعد العشاء وتنفع في وسط الليل وتنفع آخر الليل، ثوابها إيه؟ أيقظوا صواحب الحجرات ماذا أنزل الليلة من الخزائن؟ الخزائن بتنهمر انهمار على أهل قيام الليل، الله يتنزل في الثلث الأخير فيقول هل من مستدفع للضر فأدفعه عنه، هل من مستشف فأشفيه، هل من سائل فأعطيه، هل من تائب فأتوب عليه، هل من مستغفر فأغفر له، يا إخواناً عطاءات، الله يناديك، مين يتنزل! مين ينادي على مين! مين بينادي على مين يا جماعة!
يبقى الساعة اللي قبل الفجر ساعة العطاءات والفتوحات والكرامات.

الساعة الثالثة: الساعة قبل الظهر.. جلسة التهجير

الساعة الثالثة الساعة اللي قبل الظهر اللي هي التهجير اللي هي بتسمى جلسة التهجير، قال رسول الله -صلى الله عليه وسلم-: **"ولو يعلم الناس ما في التهجير لاستبقوا إليه"** صححه الألباني، منظر جبار، الناس في الساعة اللي قبل الظهر دي الدنيا مؤلعة، الطلبة بتتنافس في الجامعات، والتجار بيتنافسوا على الصفقات في الأسواق، الكل بيتنافس يا جماعة..

النبي يقول لو الناس يعرفوا الساعة اللي قبل الظهر دي إنك تروح الجامع وإنك تقعد في أوضة نومك تعبدي ربنا فيها ثوابها إيه الناس هتسيب السباق على الدنيا وهتسابق على الجوامع، الناس هتجري مسابقة مين اللي يلحق مكان في الجامع، ياه، يبقى دي جلسة التهجير، **لاستبقوا إليه**، ده الساعة الثالثة.

الساعة الرابعة: الساعة بعد العصر.. تسبيح الآصال

الساعة الرابعة اللي هي الساعة اللي بعد العصر اللي هي تسبيح الآصال يا إخواننا يعني إيه تسبيح الآصال؟ اللي هي من العصر للمغرب دي كل الأنبياء كانوا بيقدوها، كل الأنبياء كانوا بيسبحوا ربنا فيها، تسبيح الآصال ده اللي هو إحنا بدأنا بيه الحلقة اللي هو **"نعم العبد إنه أواب"** سيدنا سليمان **"إذ عرضَ عليه بالعشيّ"** العشيّ اللي هو الوقت اللي إحنا بنتكلم عنه ده، الساعة دي..

"إذ عرضَ عليه بالعشيّ الصّافناتُ الجيادُ * فقالَ إني أحببتُ حبَّ الخيرِ عن ذكرِ ربي حتى توارتُ بالحجابِ" ص:32،31، أخذ قرار لما الساعة دي راحت عليه **"رُدُّوْهَا عَلَيَّ فَطَفِقَ مَسْحًا بِالسُّوقِ وَالْأَعْنَاقِ"** ص:33، يا إما مسحها دبحها يا إما مسحها ختمها ختم النذر للجهد وخروجها من ملكيته تمامًا **"فَطَفِقَ مَسْحًا بِالسُّوقِ وَالْأَعْنَاقِ"** والنتيجة النهائية إنه مسحها من حياته؛ لأنها عطلته عن ساعة تسبيح الآصال.

يبقى دي الساعة الرابعة.

اختار دلوقتي اخترت ولا لسه؟ ماعدش غير ساعة واحدة يا جماعة الساعة اللي بعد الفجر اللي هي جلسة الضحى لازم كل واحد منكم يختار دلوقت، إنه أواب، نَعَمْ العبد علشان ربنا يقول عليك نَعَمْ العبد، علشان ربنا يقول عليك نَعَمْ العبد، علشان نبقى حققنا قَوْل الله: **"وَاصْطَبِرْ لِعِبَادَتِهِ"** اللفظ العسكري، أوعي تسيبي سلاحك، يبقى وردك اليومي ده سلاحك في مواجهة الشيطان، سلاحك في مواجهة نفسك، سلاحك في تصليح قلبك، سلاحك في كسب حسنات توصلي بيها لربنا، سلاحك، أوعي تغفل عن سلاحك في الغابة بتاعت الحياة اللي إحنا عايشين فيها دي.

الساعة الخامسة: الساعة بعد الفجر.. جلسة الضحى

الساعة الخامسة جلسة الضحى، في بعض الأثار إن فيه باب في الجنة اسمه باب الضحى، يعني إن الساعة الأولانية في اليوم دي ممكن تبقى باب في الجنة؟

على فكرة يا جماعة الكلام ده مش عجيب، عارفين الكلام ده مش عجيب ليه؟ لأن الساعة الأولى في اليوم هي رأس حربية اليوم، اللي هيعرف يظبط نيته في الساعة الأولى ويجمع همه على الطاعة في الساعة الأولى ده هيبقى اليوم بتاعه كله طلقة، يعني دي شحنة اليوم كله، يعني دي رأس الحربية بتاع اليوم كله.

هتقوي أنا ورايا شغل الصبح ودراسة، تلحق تنام ساعتين إحنا دلوقتي يا جماعة الفجر بيدن ثلاثة ونص، الشغل بيبقى ثمانية ونص عند معظم الناس، وفيه ناس كمان بيبقى تسعة، عشرة، يعني تلحق تقعد جلسة الضحى وتنام ساعتين وثلاثة وإنت مستريح كمان.

يا إخواناً قال رسول الله -صلى الله عليه وسلم-:

"من صلى الفجر في جماعة -بالنسبة للمرأة في بيتها في أوضة نومها- ثم قعد يذكر الله حتى تطلع الشمس ثم صلى ركعتين كانت له كأجر حجة وعمرة تامة تامة تامة" حسنه الألباني.

العمرة دلوقتي بقت بخمسة عشر ألف ريال، يعني خمسين ألف جنيه عمرة رمضان اللي جايه دي، يعني تخيل إنت كل يوم والحج بقى تخيلوا بكام، إنت كل يوم بتبعد ربنا في الساعة اللي أول اليوم بمائة، مائتين ألف جنيه عبادة بس لربنا -سبحانه وتعالى-.

يعني منتاش عارف تروح للكعبة في رمضان، يا اللي نفسك إتك كنت تروحي عملي عمرة في رمضان، يا اللي نفسك إتك كنت تروح للكعبة في رمضان، الكعبة جات لحد عندك، الكعبة جات في المسجد اللي جنب بيتك، الكعبة جاتك وتأخذ ثواب حجة وعمرة تامة تامة تامة وإنت جنب بيتك.

الساعة اللي بعد الفجر من أحب الساعات إلى الله في العبادة وأحب الأوراد، الأنبياء كلهم مفيش نبي كان بيسببها في العبادة وذكّر الله -سبحانه وتعالى-، الساعة العظيمة دي اللي هي رأس حربية اليوم كله.

اختر وردك الآن

اختاروا بقى يا جماعة قلتكم خمس أوراد أهو، خمس أوراد: الساعة اللي بين المغرب والعشاء اللي هي إحياء ما بين العشائين، والساعة اللي قبل الظهر اللي هي جلسة التهجير، والساعة اللي بعد العصر اللي هي تسبيح الآصال، والساعة اللي قبل الفجر اللي هي قيام الليل، والساعة اللي بعد الفجر اللي هي جلسة الضحى، اختار، اخترت إيه؟ اخترت ورد من الخمسة؟

يا إخواناً إحنا في موسم العبادة يعني إحنا دلوقتي في المعسكر التدريبي اللي بناخد منه شحنة الانطلاق للسنة كلها يبقى لما ناخذ قرارات ما بعد رمضان من أول رمضان ومن وإحنا لسه في رمضان ساعتها باذن الله - سبحانه وتعالى - هتفرق معانا طول العمر، هتفرق معانا أوي أوي أوي.

وَاصْطَبِرْ لِعِبَادَتِهِ

"وَاصْطَبِرْ لِعِبَادَتِهِ" ربنا قالها مرتين في القرآن للنبي - عليه الصلاة والسلام -، المرتين كانوا عن العبادة، في سورة مريم وفي سورة طه، سورتين ورا بعض، المرتين عن العبادة.

اصطبر يعني اصبر على مالا يطيقه الناس، خليك إنت صابر، الناس مش راضية تصبر على العبادة خليك إنت صابر. اعبديه على أد ما إنت نفسك يفتح عليك، اعبده على أد ما أكرمك ونعمك، اعبديه على أد ما نفسك يفرج كريك، اعبده على أد ما نفسك قلبك ينور ونفسك تزكو، اعبديه على أد ما نفسك تبقى عندك عزيمة في الطاعة وفي الحياة وفي مواجهة الحياة.

العبادة سبب تنزل الكرامات، العبادة سبب انهمار الفتوحات والعطاءات، العبادة سبب كشف الكربات، العبادة سبب القوة في مواجهة الحياة، العبادة سبب لمدد الله، العبادة سبب للتمكين في الأرض، العبادة سبب لأن يبقى ليك قيمة عند الله، العبادة سبب لولاية الله وكفاية الله، العبادة سبب لإنارة القلب بمقامات الإيمان، إن القلب يبقى جنة.

هي دي الكلمتين اللي أنا قلتهم دول خلاصة الحلقتين بتوع "وَاصْطَبِرْ لِعِبَادَتِهِ".

اصبري على العبادة، اصبر على الورد المقدس اليومي، ربنا يوفقكم، ربنا يا جماعة يجعلنا من الموقنين في عمرنا لأن اللي مالوش ورد عبادة ثابت إنسان مخدول، إنسان بيتخذ دينه هو، إنسان مش عايز ياخذ الدين بالجدية وبالعزيمة.

دعاء الخاتمة

اللهم وفقنا وما توفيقنا إلا بالله عليه توكلنا وإليه نيب، ربّ اشرح لنا الصدور ويسّر لنا الأمور، اللهم أعنا على ذكرك وشكرك وحسن عبادتك، ربّ اجعلنا لك صوّامين، لك قوّامين، لك ذكّارين، لك شكّارين، اللهم أعنا بما أعنت عليه عبادك الصالحين يارب، نحن بك وإليك، نحن بك وإليك، إن أعنتنا أعنا، إن وفقتنا وفقنا، إن سددتنا سدّدنا، إن أيدتنا أيدنا، يارب، اللهم اجعلنا لك صوّامين قوّامين، اللهم ارزقنا تلاوة القرآن آناء الليل وآناء النهار على الوجه الذي يرضيك عنا، اللهم أعنا على ما تحبه وترضاه، اللهم افتح لنا من أبواب عبادتك ما ترضى به عنا، اللهم افتح لنا

أبواب الحج والعمرة وارتزقنا المتابعة بين الحج والعمرة يارب العالمين يا أكرم الأكرمين يا أرحم الراحمين يا خير الرازقين
برحمتك يا أرحم الراحمين.

سبحانك اللهم وبحمدك، أشهد أن لا إله إلا أنت أستغفرك وأتوب إليك.
جزاكم الله خيراً

تم بحمد الله

شاهدوا الدرس للنشر على النت في قسم تفريغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>